

四庫全書

集部

欽定四庫全書

蘇魏公文集卷三十二

宋 蘇頌 撰

外制

右諫議大夫知制誥宋敏求依所乞落知制誥守

本官差遣如故

勅夫代言詞禁抗論諫垣皆侍從之榮塗本才髦之選處苟堅辭職之請靡勞遞直之勤特徇雅懷俾原近秩

以爾具官某學窮墳索世掌絲綸三朝擅文史之華兩
掖著猷為之美朝廷命令久預于演裁臺閣規撫兼推
于練達忽告眊昏之苦願還翰墨之司再控封章備形
懇至姑就七臣之列仍專衆職之臨噫去劇即閒既從
于爾欲待賢優禮當體于予衷勉思埤政之謨式副疇
咨之渥可

權三司戶部判官尚書司勳員外郎李立之可主

客郎中

勅具官某今之由尚書郎為三司佐屬其選重矣非有
積累之資明著之效則豈稱其官使哉以爾清白承家
廉方為吏名登華省治有顯聞曩丞水官能勤于障導
移職計部善析于貨財課在有司法當遷秩擢正客曹
之列仍叅戶版之員膺茲茂恩益念成效可

左騏驎使劉斌可皇城使

勅具官某諸司置使秩有等差而皇城為東班之首非
夫歷仕綿久材用章著安能陟級而致榮階以爾沈敏

之資幹力之效擢于勇爵實在朝聯累歲有勞中樞校課當叙遷于官列俾陞冠于使華祇膺優異之恩益念始終之節可

皇姪左千牛衛將軍令諤可右監門衛大將軍

勅羣臣考陟之法近則四歲遠或六年輒遷一官是謂大比至于宗室則以十歲為定蓋超歷階序不與外庭比故不得不積其歲月而養成其才質也以爾具官某承襲慶美本乎天源生知孝恭長受寵祿能循保氏之

教不忘為善之樂今宗正言爾服官滿歲由環衛而陞
大將可謂峻遷矣敬以命爾抑用前詔爾其夙夜匪懈內
奉朝請外遵家政則可以遠于悔尤而守其祿位也
可

尚書祠部員外郎充秘閣校理鄭雍可度支員外郎
勅具官某秘書圖籍之府非博學洽聞之才未嘗預校
文之列郎官清要之司非通明敏識之士未嘗在承務
之員二者兼榮斯謂優異以爾詞科甲選治狀最稱擢

真書林荐游華省有司上累年之課官闕稔聞南宮叙左曹之聯支度尤貴用增爾秩俾酬厥勤更思善職之謀以副類能之舉可

鄉貢進士葉祖洽可大理評事簽書奉國軍節度判官廳公事

勅某朕遵累聖之成謨復三年之選士俯臨便坐親策諸生爰擢敏才真之上第以爾士鄉特起貢部陞名方領矩步以來庭大對危言而應問嘉乃博通之習用推

優異之恩棘寺評刑超登于仕籍海藩佐幕往涖于政
經無忘學古之規式副優儒之舉可

太常博士充秘閣校理安燾可祠部員外郎

勅具官某夫校文天祿方登博雅之才承務南宮是為
清要之選爰疇善職叙進榮班以爾典學清修決科高
妙試之藩府則外臺稱從事之賢擢于奉常則有司言
禮官之最因第勞于歲課宜陞寀于冰廳益思講繹之
勤用副咨詢之舉可

駕部員外郎田瑋等改官

勅某國朝之制自諸司四品暨尚書郎卿寺丞屬皆委之審官考核其賢否雖羣萃而序遷士常患其雜選然勞陞而過黜時亦以為遴選與其進者厥惟艱哉惟爾之材能強辨有司銓叙之蓋已久矣姑用四載之最稍擢二官之榮勉收後勤副我明陟可

都官員外郎新差權發遣江南西路提點諸州軍刑獄公事張頴可職方員外郎餘如故

勅某朕閱朝士之籍擇其有聞于時者試之以煩劇之
務內則臺省之僚列外則憲漕之事權績用既彰褒擢
何吝以爾文雅沉厚士林所稱幹辦精明吏課連最方
且委以一道案讞之重而又及乎四載計比之期宜增
秩于清郎示甄勞于久次若其奉使之稱職治獄之平
反則早有顯庸豈限常格爾其勉懋副我疇咨可

屯田郎中蘇泳等改官

勅具官某尚書諸郎其品第五惟古號為清要在今得

以叙遷稽其職儀是謂通顯以爾吏資官闕計比惟優
朝著省闡踐歷滋久擢進烏星之位漸陞鸞黨之階往其
欽承無怠官守可

都官郎中王力可職方郎中

勅某夫承務南宮出使近服皆朝廷之優選而仕進之
榮途屬奏歲勞用推恩陟以爾士科擢秀郎省馳聲試
以治煩載嘉政事之敏委之督漕益懋將輸之程姑循
校課之常稍進掌圖之秩宜收後最以副甄揚可

比部員外郎刁綬俞士龍可並駕部員外郎

勅具官某尚書郎官皆有副貳視其曹務之閒劇以為
爵馭之等差限年而遷盖有恩格以爾能勤職業休有
幹稱履歷周行綿更歲次姑由吏課之最叙進省闈
之聯往承渥恩益勵素守可

都官員外郎充廣陵郡王申王院教授郭源中可
職方員外郎餘如故

勅具官某南宮為郎其選尤美有司校課限年乃遷自

非積閥之優靡預類能之擢以爾清門襲美仕歷朝閥
近著荐才職居宗邸頗聞善誨之益且懋宿官之勞宜
即省闈進榮班等祇欽甄序之渥無怠講論之功可

虞部員外郎程莊可比部員外郎

勅某尚書員外郎自唐以來號為清要今雖不涖省事
顧其榮秩不減平時考課而遷是曰優命以爾吏資之
敏久試外官歲月之勞荐登最格矧已更于華著宜叙
進于通班祇膺加等之恩益念匪躬之節可

大理評事章望之可光祿寺丞致仕

勅具官某通古今之學擅體要之文命屈當年仕沈下
列志不櫻于簪組心自適于江湖恩命屢頒輒遜辭于
榮進懇誠再露祈退就于燕休守臣為言高風可尚優
進膳丞之秩俾從鄉閑之居祇欽寵章益保冲粹可

前守惠州歸善縣主簿充國子監直講盧侗可衛尉寺丞

勅具官某爾以經藝名家禮闈奏技勾稽南服外臺稱

其廉平講訓上庠諸生服其行誼姑用年勤之久叙陞卿屬之華尚倚師儒使留黌序其益思于循誘冀有助於化成祇欽寵章克終譽問可

試秘書省校書郎和州防禦推官充國子監直講
崔公度可試大理評事充彰德軍節度推官

勅具官某博學多文見推士論韜光蘊行自樂丘園向從特起之求且預上庠之召屬辭親養靡應命書逮喪紀之既終閱荐章之交至惟其才諳宜有甄褒俾從事

於方州竚觀能于幕畫勉思致用副我擢賢可

大理寺丞文大同可右贊善大夫

勅某今夫仕者既通籍于朝闈東宮與上臺班品雖異而推選之遴選次實均以爾席慶高門隸官卿寺分登外局休有能聲比最攸司甫應恩格擢聯宮贊之秩漸階省闈之榮益懋來勤佇收遠績可

右贊善大夫朱溫其可殿中丞

勅具官某天下之獄覆于刑曹設官置參其責均重閱

茲校課之美宜有旌能之恩以爾仕以經明進聯朝定再膺詳讞之荐屢告平反之言姑用吏勞擢登看省宜益思於明慎佇顯副于甄揚可

奏舉人試大理評事前權信州軍事推官呂昌壽等改官

勅某今之銓選之法至為詳密以歲課校其勞勤以荐章視其操守二者備矣然後叙遷美秩榮資由此階漸惟爾閱閱咸應於茲俾陟京臺之聯益圖吏治之效可

皇姪前金紫光祿大夫右監門率府率士臬可舊

官服闋

勅執親之喪鉅創何已順禮之變再期則除粵予近宗
動稟成訓屬居廬之終制當引籍以承恩以爾具官某
茂公族之華陟朝闈之序衰麻去位既畢于哀情簪紱
還臺宜陞于顯列復踐儲坊之秩入榮拱著之趨勉荷
徽章采勤素守可

皇后生日奏親堂叔國子博士向綽可檢校工部

尚書充內園使

勅具官某內朝諸司並置使領參擇才武入備禁局由
文吏而對遷非親勲而莫允矧中宮之尊黨援誕日之
慶條式推渙恩抑有舊比以爾綽席公卿之餘緒仕閭
著之通班夙富吏資善守門法屢試治煩之務見推幹
裕之能陞諸使聯示以優寵非特私于近戚蓋亦用乎
美才勉勤功名乃副甄擢可

內園使知欽州石鑑可南作坊使令再任六宅使

知邕州陶弼可左驛驛使令再任

勅嶠南諸州搯于夷境者邕為會府而欽當要衝帥守之臣其選差重以爾具官陶弼握武緣之節馭邊有方以爾具官石鑑析羅山之符撫俗尤善而皆文敏自喜才資並優眷彼吏民方安于政迹表其治行咸進於使聯且重留于舊邦俾克終于美課宜究綏懷之畧用光獎擢之恩毋憚遠勤遂棄前績可

六宅副使張恩可內藏庫副使

勅具官某內司列使之榮並置副介增秩叙遷之法咸有差等爰擇武材庸備官制以爾策名勇爵服采禁廷頗彰幹職之勤且懋歷年之最宜疇美課躡進榮資往欽甄異之恩益盡忠勞之報可

文思副使劉昌孫可左驍衛將軍致仕

勅具官某夫仕或為祿貴夫逮親此士大夫之所美也爾居武弁能蹈斯言以偏堂之耄年祈謝事而就養是可嘉尚所宜顯褒擢于環衛之班俾從家居之佚遂爾

素志嘉茲寵榮可

內殿承制樊德成可左屯衛將軍致仕

勅具官某傳曰陳力就列不能者止此為臣之大方也
爾早仕武階繇更外使自陳力疾之苦難效當官之勞
願去班聯良嘉止足寵以環宮之衛俾安里閭之居祇
服恩榮遂諧願適可

殿中省尚藥奉御直翰林醫官院張士禹可殿中
省尚藥奉御充翰林醫官副使

勅具官某周官醫師掌醫之政令以事制祿十全為上視功
進等厥惟舊哉以爾執技精通居官勤恪擢在尚方之直榮
參內著之朝屬我諸姑近嬰綿痼言爾診調之效願酬處劑
之良陞諸使聯用獎能事宜悉心于遠術思報效于殊恩可

內殿崇班趙永圖可舊官服闋

勅具官某爾列職禁庭蚤擅恪勤之裕服喪至室已終
縞禫之期宜移素冠起還舊著內朝之籍班等惟優勉
遵移孝之方無怠首公之志可

奏舉人前大名府留守推官試大理評事謝宗孟
等改著作佐郎大理寺丞

勅具官某等秘書大理之屬官前世為文章法律之選
今銓筦之士考課來上視其資歷得以叙遷爾等咸以
為吏之勞從外臺之荐俾之佐著作丞卿寺所以廣擢
材之路也膺茲並命各念首公可

奏舉人前京兆府乾祐縣令趙全等改著作

勅具官某麟臺著作古稱文雅之選天官考課今為進

擢之階以爾詞學決科廉勤在事校其年最甫應陟書
俾遷京省之聯用獎吏能之美不欽恩典益厲操修可
奏舉人試秘書省校書郎前守宣州司理叅軍王

醇可著作佐郎

勅具官某有唐吏部以四才三實選拔賢能今之銓衡
略用此制而又峻以考格責之荐章一不應條未嘗進
擢惟爾之器質才諳有司校之詳矣廉明勤辦外臺稱
之備矣引對便坐審察其才陞列秘書之聯將觀幹劇

之用益懋乃事副茲寵惠可

奏舉人前鳳州梁泉縣令張延年等改官

勅具官某中銓考課之法以才實為差外臺荐籍之章
以幹廉為重進人之路辨等尤難以爾夙富吏資久仕
州縣校其年最應乃陟書叙遷卿屬之華以顯宿官之
效服我休寵無忘後勤可

試秘書省校書郎守河南府法曹叅軍充魯王宮

小學教授王祁可大理寺丞

勅具官某朕惟宗室子孫之衆欲其通知于道藝故擇
儒雅之士為之講導以輔成其性質爾以經行修明來
預茲選服職累歲其勤至矣擢陞卿寺之屬仍寘官
之員茂對殊私益思惠訓可

奏舉人前彬州高亭縣令邢構等改官

勅某今天下郡縣之廣吏員之衆非責之荐者則才勞之
士何由而自達耶以爾早從銓集外有吏能善狀可稱文章
狎至宜甄久職之效擢列上臺之官祇服恩榮采勤治績可

前定州觀察推官常宗仁可衛尉寺丞

勅某朕念夫銓選之士叙進惟艱親程其能務收厥善雖有
細故而不棄遺爾歷任有年書考十五外官稱荐其勞可
嘉特示甄陞寘之京寺膺茲優異之典無懈終始之勤可
秘書省校書郎守唐州泌陽縣令朱紘可大理寺
丞餘如故

勅某夫農田者生民之本也川澤者農田之資也而當
官之人常患不能為之勸導使民棄本而趨末者衆矣

爾居邑令能志于茲修復故渠為利旁境計臣言狀請
酬以官因擢九卿之丞俾仍百里之宰往膺明命善撫
吾民益懋前勞乃稱甄寵可

蕃落軍都指揮使馬忠等換內殿承制

勅某以拳勇聞于邊疆以勤良備于軍校為種首之所
嚮嘉技擊之尤精帥路為言便庭親試載閱武才之敏
擢躋殿著之華閨籍聯榮恩章不次當益圖于忠蓋在
勉懋於勲庸可

西頭供奉官梁錢可右清道率府副率致仕

勅某七十致仕士之常也爾年未至而願歸休嘉其退
尚之誠宜有褒遷之渥儲坊散秩俾遂家居祇服恩章
往安閭里可

右侍禁于用和可左清道率府副率致仕

勅某早以吏勤擢陞班列逮茲齒耄願謝官聯良嘉知
止之心俾遂歸休之佚儲坊美秩里閑安居往祇服于
明恩足為榮于晚節可

右侍禁郭懷慶可右清道率府副率致仕

勅具官某七十致仕禮經之常也爾不待年至以疾自言閔筋力之既衰豈簪裳之可強陞以東儲之秩俾為居里之榮祇服恩私足慰遲暮可

左僕射兼門下侍郎平章事魯公亮奏醫人謝維可試國子四門助教不理選限

勅某爾傳習上池之技善識五藥之宜嘉勤事于相門尚未霑于仕版奏章來暨恩典有常往膺一命之榮深

盡十全之效可

楚國大長公主遇南郊奏駙馬都尉李瑋祖宅門客
廣文館進士許槩可試將作監主簿不理選限
勅具官某蚤隸上庠荐游主第屬邑司之有請爰郊慶
之推恩言爾多文且祈筮仕俾膺試秩之命用酬肄業
之勤祇服寵私勿忘修飭可

太子少師致仕趙槩奏醫人張琬可試國子四門
助教不理選限

勅某習岐黃之論游卿輔之門術業甚精診治多應特
徇舊臣之請用推試秩之恩祇服殊私益勤所學可

光祿卿潘軫遺表男緩可試秘書郎

勅某九卿之子例以試秩起家屬乃父之云亡抗遺章
而來上閔其陳力之久宜有卹後之恩擢爾仕塗俾延
世祿當益思于負荷且無忝于榮名可

兵部員外郎充寶文閣待制知相州傅卞遺表男

回次男同並守將作監主簿令持服

勅某近著之臣忽傷于徂謝恤終之典宜異于常規屬
覽遺章祈爾世祿命擢陞于京寺俾不墜于家聲祇服
優恩勉思負荷可

追官勒停人鄭叔熊可試國子四門助教不理選限
勅某早用近臣之荐擢聯試秩之榮坐法奪官援恩自理
嘉素專于術學俾牽叙于上庠祇率恩章益思修省可
太常少卿致仕謝檢孫延年可試監主簿

勅某近制尚書外郎謝事得官一子以榮其歸所以褒士大

夫進退之美也維乃祖父仕列亞卿解紱引年祈恩裕嗣
假爾一命慰其晚年往膺試秩之榮益念克家之訓可

守濮州文學尹處晦可曹州文學

勅某頃列仕階尋貽吏議廢官滋久援霈自陳矧已寘
于散曹宜稍遷于近郡益思循省以荷甄收可

翰林醫學守應州金城縣主簿溫果母梁氏可特

封長壽縣太君

勅具官某母某氏爾子以方技名家禁庭待詔喜有逮

親之祿願移遷秩之恩眷乃高年遂其私欲特疏榮于湯邑俾增耀于鄉閭膺茲寵光足勸孝養可

都水監飭料後行蒲士隆可孟州司馬

勅具官某給事上臺歷年滋久苦于羸薊願遂休閒易以州佐之聯俾從家居之佚被茲榮命足慰歸塗可

故知溪洞新遠州軍州事田忠利長男洪祐可依
前知溪洞新遠州軍州事

勅某世居邊徼夙効忠勤屬乃父之云亡當襲官而繼美

爰推恩渥俾守封疆其善撫于裔夷思克承于門緒欽
膺明命益盡丹誠可

溪洞高州四甲巡檢田洪祐弟洪保承兄官

勅某乃父早著忠勞奄茲淪謝爾之伯氏已襲故封遞
遷厥官俾慰遐裔爾其善承世美思撫邊民無忘循警
之勤乃稱恩榮之美可

麟州兀羅族子弟屈德可銀酒監武充本族副都
軍主

勅某代居邊陲號有才勇承父兄之餘緒為種族之推
先命傳襲于世資俾統綏于壯籍通階試秩式示朝章
膺茲渙恩無怠乃事可

蘇魏公文集卷三十二

欽定四庫全書

蘇魏公文集卷三十三

宋 蘇頌 撰

外制

提點陝府西路諸州刑獄公事司封員外郎趙瞻
可祠部郎中

勅承務中臺左曹謂之清要觀風外服右陝當其會衝
惟時通籍之良方重讞刑之寄稽其治課應我陟書以

爾具官某博通古今多識治要早預法冠之選往分郡
組之行稔其休聲擢以方任案條察吏有能臣之風閱
歲校勞居奉使之最進列冰廳之秩益增星節之華宜
勉懋于事為副疇咨于近劇可

虞部員外郎曾孝寬可比部員外郎

勅具官某古之仕臺閣者多用公卿之世以其習熟典
章可任以事隨資叙進式佇甄陞以爾士操清修學術
詳敏繼承門法厥問甚休副郎省六聯之華結天官四

載之課姑循常格擢列近曹惟勉懋于官箴用顯揚于世美可

三司度支判官尚書刑部郎中充集賢校理王瓘
可尚書兵部郎中依前集賢校理充三司度支
判官羣牧判官尚書比部郎中王誨可尚書司
勳郎中依前羣牧判官

勅夫考功黜陟之法自有虞以來未之或廢我朝稽古
其令甚明雖職列臺閣之華任登要近之地必由校課

然後議遷以爾具官王瓘文敏學優才通用博服勤鉛
槧之業振務計財之繁以爾具官王誨仕富吏資行循
家法稔譽郊畿之政贊司廐牧之良而皆久次郎臺荐
登最格稽其功狀應進上階武部冠於右曹勲書次于
大選用酬爾善各俾序陞若其治迹之殊尤材資之美
茂則朕所考察不在有司之比往服休命爾其勉哉可
尚書比部郎中馮博雅可如京使惠州刺史

勅具官某國家設官之制略擬唐規列使之名近對郎務

仕者更踐惟才所宜矧兼領于郡章示優隆于武爵自
非勲戚曷允咨俞以爾早服閨臺夙推器幹襲相門之
餘緒連宗邸之外姻間覽奏封之陳載嘉閱閱之美俾
從華省易授內司掌庾京都實超于資等析符善壤益
重于聯班佩服恩褒之華勉圖方畧之上可

前秘書丞充集賢校理孫洙等可並舊官服闋

勅具官某夫服喪去位人子之私恩也脫衰還朝人臣之
公義也故進退不踰其禮則忠孝可以兩全以爾仕以文

儒籍在閨省遭罹艱疚甫畢禪除姑徇常經起仍舊著
益思所以揚名顯親之效在勉懋于公家而已可

尚書比部郎中范仰之可駕部郎中

勅具官某審官考課之法以四歲為限南宮遷秩之等
有六行之差旌擢吏勞宜優寵典以爾材資敏茂治狀
詳明為郎有年奏最應格進列右曹之上益光華省之
游欽對明恩更圖遠績可

駕部員外郎李安道等改官

勅具官某等朕命有司考羣吏之治限年而上課隨資而叙進雖令有定著而恩無汎及允如遷格茲謂宿官以爾等或仕歷省闈或籍通閭閻出幹衆務入奉外朝稱最及期稽功斯善增秩一等姑用前規若乃才譽彰聞績效明白則懋官懋賞豈限常資爾等勉之副我明陟可

都官員外郎仇著等改官

勅具官某等尚書郎九卿丞屬皆外庭美選通籍之士

得以次遷所以辨才能而旌吏閥也以爾等材力之敏試
于治煩操履之修行而寡過分列省寺外更事勞有司
議年既成積累之效隨茲進秩咸增班爵之榮祇服恩
華勉思忠報可

國子博士高保衡等改官

勅具官某吏治有勞法當甄獎天官覆實恩有次遷爰
錄顯庸特推茂渥以爾夙勤士操進列朝闈幹職不愆
奏功斯善錄其四載之課擢以一官之榮益務遠圖丕

欽厚獎可

西上閣門使李評可東上閣門使

勅具官某中閤典謁列使橫班陟降殿墀導揚詞命非
素推于詳練固靡副于咨詢以爾世服忠純材資敏達
白擢聯于上閤參掌選于西銓朝廷之儀頗聞事舉閤
閤之課復用最陞特甄累歲之勤就陟東藩之秩宜益
圖于遠績期報稱于異恩可

皇兄前右武衛大將軍春州刺史仲虺可舊官服

閔

勅具官某三年之喪稱情而立文日月既終衰麻必釋
蓋天下之通誼也爾以宗室之秀服閨朝之聯向罹親
憂銜恤在疚既畢禪織之制宜還簪紱之榮欲忠孝之
兩全在始終而一節往祇厥位當體訓言可

皇姪前右千牛衛將軍令羽可舊官服闋

勅子之于親也有鞠育之恩顧復之慈三年之喪未足
以報其厚德然聖人稱情而立文不可多寡故天下共

之以爾具官某宗室之近支臺閨之顯列遭罹不幸棄
失所天服衰而居倚廬克遵禮式鑽燧而更舊火甫畢
禪除宜還定著之聯入奉內朝之謁無忘信厚茲謂顯
揚可

仁壽郡君張氏可才人

勅嬪婦之列蓋掌帥于宮庭才美之名實優隆于位號
載嘉內治之助特厚言綸之頒某氏體閑淑之令姿稟
肅雍之懿範自參承于御叙嘗進躡于恩封而謹職中

聞顧德言之並茂增華近序介祥祉以尤殊宜加印綬之榮用光圖史之鑒惟靜專所以安寵數惟婉約所以副褒章服我訓辭無忘欽率可

左千牛衛大將軍羅榮可依前官充絳州團練使勅漢之執金唐之諸衛今雖處于閒秩然猶列于上班或兼方任之權益顯官儀之貴以爾具官某早登勇爵嘗典伍符因齒力之向衰擢禁環而甚寵仍司戎仗獲就燕安宜優異于久勤俾復陞于團結斯為厚渥足慰

暮年尚殫夙夜之心以答始終之遇可

皇城使宜州團練使柳涉可左千牛衛大將軍宜
州團練使

勅具官某國家待賢能之士恩禮甚厚方其壯盛則任
以權劇而責其實效及其衰老則處之便安而俾遂乎
休養以爾素負材氣來仕班列臨邊有綏禦之效治郡得
廉良之稱閔其暮齡宜有優禮特遷環衛之秩仍假州符
之榮易事局于清閒示始終之殊遇體茲厚渥姑務燕怡可

秦國莊孝大長公主遺表長男供備庫副使李嗣徽可供備庫使

勅具官某朕惇睦懿親愴仁姑之早世周旋卹典鑒遺牘之所陳眷言世嗣之邁凶方倚居廬而茹痛特越從于朝序俾擢正于使名念往撫存宜體國章之厚慎終追遠益思家事之承祇服訓辭勉遵禮式可

如京副使兼閤門通事舍人王光祖可莊宅副使兼閤門通事舍人

勅具官某朕擇沈敏方重之臣委以邊畧庶幾安輯一道使不生事于疆外而爾先祖實應茲選泣事之始辦職惟勤入奏便朝講畫有素載嘉策慮特爾甄陞疇進使聯式優戎路惟爾世服忠義累更寄任宜益圖于遠績斯乃稱于寵章可

西京左藏庫副使程昉可莊宅副使

勅具官某夫服軒墀而列禁衛皆朕所信任之臣也則叙遷之法推恩固優以爾幹裕謹良擢侍近幄出護河

役訖亦有勞校課滿年功狀應陟躡進使名之美仍參拱扈之榮祇欽寵章益念忠報可

左藏庫副使鄭惟懃等服闋

勅具官某早登勇爵列在閨朝俄服親喪甫終祥祭奉追書而來集還舊次以參榮服右著之聯無忘厥守展四方之事佇集爾勞可

供備庫副使黃巽劉永清可並西京左藏庫副使勅具官某列局京都分處衆務並置使介以擢羣材今

雖無涖職之煩抑亦有限年之選向非能稱不在次遷以爾通稽右閨服勞王事出入著幹廉之效歲月成累久之勤結課荐周進官有等欽膺褒顯之渥益念公忠之誠可

未復舊官供備庫副使張繼凝等復官

勅具官某爾向以武材擢在邊徼失于禦寇用是奪官屬需恩之溥加閔公坐之滋久稍遷秩次進列通班不欽甄叙之恩無怠忠勞之報可

文思副使田守則可左驍衛將軍致仕

勅具官某仕優而賦祿年至而謝事古今之通義也以爾才力素稱擢在班列更歷中外頗亦有勞自言且衰願還所職既許之退宜優以恩躡遷環衛之資使為鄉服之寵往祇榮渥益保暮齡可

殿中省尚藥奉御直翰林院蘇惟和可翰林醫官

副使

勅具官某周禮醫師有稽功賦祿之等本朝官制有置

使立貳之文既彰厥能宜進之職以爾通上池之技聯
中省之班典領累年診治有效擢進內司之介用旌久
次之勞益念精專乃副恩陟可

太子右清道率府率致仕張忠可落致仕依前官
勅具官某七十致仕大夫之禮也豈謂夫武力之士哉
爾以才勇聞所至可紀引年當去大臣爲言都城方籍
于繕完祿秩固宜于優假特還儲率之秩俾幹留司之
煩往服殊恩尚勤乃力可

內殿崇班閤門祇候趙璞可內殿承制依舊閤門祇候

勅具官某夫入贊上閤出乘塞垣皆王爵之美選也爾以殿著之秩兼領其任自非才資之敏曷膺職秩之優屬上年勤載嘉治狀姑循班級之次稍進官聯之榮尚綴近塗益思遠業可

內殿崇班李舜卿可內殿承制

勅具官某爾通班內著之聯祇事平陽之館追惟懿主

奄謝昭辰遺奏上聞言爾勤力宜特遷于朝秩俾仍幹
於邑司祇膺優異之恩無怠始終之效可

內殿崇班張敏可左監門衛將軍致仕

勅具官某服武弁者以筋力為尚而爾之齒耄矣豈任
奔走之役閔其久勞宜有安處俾易衛環之秩歸為里
閭之榮祇欽茂恩益自休養可

大理寺丞張保微王慎儀等改官

勅具官某爾以名家子擢在京司能蹈世風不廢官守

荐者稱其幹裕攸司上于年庸法有次遷班陞一等往服朝綸之寵益思門構之承可

大理評事李德芻可光祿寺丞

勅具官某考課之法豈所以待俊異之倫然官久不遷則能者何勸以爾文雅修潔善承世風仕于京司蔚有美稱姑用四載之陟稍進一官之榮益懋遠圖以光慶闕可

大理評事楊者可衛尉寺丞

勅具官某爾延賞入官坐曹試吏能弗懈于王事既積
稔于歲勞上課應條攸司言狀叙遷之典獎勸在焉斯
漸履于榮階益服勤于治效可

前知涪州樂溫縣事鍾浚可秘書省著作佐郎

勅具官某考課之法不行久矣吏之能否何以甄明前
詔有司復修舊典而爾之治狀實應新書遷佐秘丘俾
偕榮路惟爾詞科之秀歷仕有年膺茲渥恩必能勉懋
以副朝廷責實之意也可

奏舉人前閬州錄事參軍霍亨等改官

勅具官某夫仕于州郡既擅幹廉之稱校于銓衡復成
積累之課不有恩獎曷甄吏勤以爾士操甚修官闕無
曠從外臺之尉荐副便坐之收敷擢聯京司俾漸榮路
所宜欽率以服寵光可

奏舉人前權知建州節度推官孫宇等改官

勅具官某夫甄擇才能莫若觀詳試之效考察言行莫
若責保任之人由此而陞得士為衆以爾歷官州縣亦

既有年覆實銓衡咸應前格因唱名于便坐命遷秩于京司欽承渙恩勉盡勤恪可

奏舉人前陝州陝縣尉常景可光祿寺丞奏舉人前晉州趙城縣令安壽可著作佐郎

勅具官某等郎內閣丞蘭臺遷佐皆京司之美官也由選部而陞者非詞學之科與公卿之世不得與焉以爾等仕于縣邑或令或尉皆有善狀稱于知己中銓考實便坐推恩各用爾資進增厥秩既蒙獎擢之命宜盡公

忠之心可

奏舉人前權淮康軍節度推官試秘書省校書郎

許宗舉等改官

勅具官某等九卿之屬皆美官也秘書以待文雅之士
大理以進詳明之才由銓筦而叙遷蓋榮塗之階漸以
爾等或詞中科級或仕起世資久從州縣之勞繼有知
已之荐引對便坐擢聯上臺仍俾長民益思善俗可

延州甘泉縣令張圃可太子中允致仕

勅具官某今之仕于銓選而不虧廉守者其告歸也則以朝籍寵之所以嘉夫士操也以爾文中科選官為長民甫及始衰之期乃懷知止之尚陞秩儲禁增美鄉閭服我褒優之恩慰爾冲退之志可

登仕郎守祁州深澤縣令韓孝直可守河中府河

西縣令

勅具官某捕盜之格殿賞尤嚴綏安里閭良藉幹畫爾頃尉畿甸能勤厥官冠攘就擒功最應令擢以大邑寵

其前勞宜善撫于羣元思益圖于後效可

儒林郎行秀州華亭縣尉劉安世可守越州上虞

縣令

勅具官某翦除盜賊肅清里閭尉事也爾隨牒遠方能
勤厥職剽聚之黨一舉而擒錄其前勞易以邑令勉收
撫字之最式矜甄收之恩可

駕部郎中致仕趙宗閔男觀可試秘書省校書郎
勅具官某男某士大夫年至致其職事于上於是有賞

延之澤以及其子孫古今之所同也爾父仕歷省郎引
年得謝俾官一子以寵其歸爾勉承之無替厥服可

故恩州司理叅軍王獎男覲可守鄆州須城縣主
簿

勅某男某爾父頃掾清河没于城守當推卹典以及其
家而爾方稚年未任仕格逮茲有立可以入官因命舉
于前恩俾勾稽于便邑所宜竭力以亢厥宗可

故給事中充天章閣待制王舉元遺表親孫王璞

可將仕郎試將作監主簿

勅某朕念彼帥臣奄遺于明代恤其家事特厚于恩綸
爾實裔孫早聞義訓特推試秩之命俾逮亢宗之榮善
守世風無忘學古可

東頭供奉官王唐卿可內殿崇班

勅具官某仕無文武之異而以登朝為貴況通班殿著
是曰華選以爾策名右列從事有年校其勤勞材力可
見稽于令格遷擢攸宜進聯廷籍之榮深謹官箴之畏

可

左侍禁趙昇可清道率府副率致仕

勅具官某爾以拳勇自奮擢寘仕聯體力未衰遽辭祿秩惟其知退之果宜有優遷之恩儲率榮資鄉閭歸佚膺茲褒渥遂爾素懷可

應天府進士陳宗望永寧軍明法劉堯可並逐州軍助教

勅某今夫布衣韋帶之士挾藝文而遊場屋至老而無

所成名是亦可矜矣屬逢三歲之舉特推一命之恩用慰晚年足勸學者可

制置三司條例司奏潭州湘陰縣鄉貢進士李度可將仕郎潭州長史

勅某朕念夫服田疇之民多水旱之患嘗詔執事勸人興功爾為鄉儒有志於是倡率閭里繕完隄防卒化汙萊遂為膏壤覽使者之言狀命州佐以起家祇服殊恩更思來效可

軍員換諸司使副及崇班承制

勅某人等夫入奉宿衛出為廷臣蓋勇爵之甚高實公
朝之慎選爾等擢于武旅號有材謀亦既程其器能是
用陞于仕綴寢服褒華之渥當懷奮勵之誠往圖後勤
無怠素志可

軍都指揮使諸班都虞候與除忠佐帶遥郡不帶

遥郡

勅某人等軍師之長是皆材武之倫進退之間固有甄

優之比第其功次需以寵章爾等典領和門周旋歲序
宜易興行之領往參軒陛之聯尚體恩榮無忘忠蓋可

軍都指揮使諸班都虞候與轉軍分帶遥郡或已

有遥郡

勅某人等師旅命帥所以壯營衛之嚴班爵有差所以
示功庸之勸惟其遷次是曰寵甄爾等咸負壯圖久宣
忠力才勞並茂賞擢兼優進加等級之榮無替夙宵之
效可

廂都指揮使與落權正任

勅某人等夫武力之士內則為王之爪牙外則當國之藩衛雖序進之惟舊亦校勞而後遷爾等早以拳勇之名擢于拱扈之列備彰器幹善戢軍和積于歲勤應我勲典或進兵團之貴或分使竹之權茲謂殊榮勿忘報稱可

廂都指揮使


勅某人等夫立乎三軍之中使士卒服習必自拊循之

有素然後部勒之得宜用次以遷抑惟舊典爾等有事累久服勞可嘉式求壯籍之良遞進連營之領往膺茂渥無怠後勤可

蕃官慶州荔原堡左惟憲族孟怡大順城下骨咩族屈嵬蕃官慶州柔遠寨柳橋寨屈你可並元
本族軍副主

勅具官某生長邊陲服習風化裔俗推其拳勇帥路稱其材資宜推柔遠之恩擢視通班之列仍加軍領俾率

土豪祇膺寵章益念忠報可



蘇魏公文集卷三十三

欽定四庫全書

集部

蘇魏公文集卷三十四

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣盧遜

謄錄監生臣施華

欽定四庫全書

蘇魏公文集卷三十四

外制

尚書屯田郎中張徽可度支郎中

勅其三省左曹之聯一方漕輓之寄皆朝廷清要之選也非得優通敏裕之士豈嘗輕授之哉以爾文中雋科仕登朝路用能治劇擢贊計於甘泉屬委使華出案條

宋 蘇頌 撰

於閩部休有聲采稔於人言方攸司之議年嘉治課之
應最特遷支度之列且酬閱閱之勞茂對寵光彌勤遠
業可

太常博士張戢可依前官充監察御史裏行

勅御史之職所以振舉臺綱糾正朝位顧其責任豈易
其人以爾具官某典學修詞決科從仕時推幹敏之裕
加有端良之稱肅政掄才中司言狀俾從簪笏之選入
聯棲鳳之班勉務直繩副茲清舉可

太子賓客解賓王可守工部侍郎致仕

勅引年謝事禮經之訓也優賢佚老王者之政也矧夫
官列三品壽彌六紀惟其進退之際豈無旌異之恩以
爾具官某久歷閨朝嘗踐臺閣進陟儲賓之貴出分郡
組之榮以老自言知止可尚起部貳卿之秩東牟喬木
之邦遂爾榮歸加其寵命俾優游於里閑益保養於天
和可

將仕郎試秘書省校書郎充國子監直講焦千之

可大理寺丞依前充職散官如故

勅具官某昔唐之學官歲終考其殿最本朝之制限以年資擢才校功其義一也爾以敦樸有道薦於士鄉經術通明置在庠序外內更試於今五年顧其施為是可官使進丞卿寺之屬仍莅師儒之聯並懋爾能以副遠用可

職方員外郎夏旻可屯田郎中駕部員外郎俞康直可虞部郎中散官如故虞部員外郎鄭諤可

職方貲外郎散官如故虞部貲外郎姜正顏可
比部貲外郎國子博士傅共可虞部貲外郎

勅具官某周之六廉唐之四善皆天官比吏之法今之
考課參用其制視功賦祿厥惟舊哉以爾早聯閨臺稔
服吏政一官恪次四載於茲治以最聞行無過事稽於
有司之令應彼增秩之條勉思忠規以對休命可

祠部郎中充集賢校理丁諷可金部郎中依前集
賢校理散官如故

勅尚書郎皆謂之清望而左曹尤貴今雖限年序擢自
非臺閣之選不得豫遷焉以爾具官某地曹高華器質
和厚榮踐世職稔服省闈會課應條進曹有典自列諱
終之禮且援換秩之科易以司金皆聯左戶往膺寵異
之渥益懋公忠之為可

尚書虞部貲外郎張興宗可尚書比部貲外郎秘
書丞費琦可太常博士

勅具官某等夫尚書副郎奉常掌故皆臺閣之顯秩非

俊良而不登考課而遷益疇善最以爾等或仕承世闕
或文中秀科咸有吏資之明歷更民政之美姑緣歲比
叙進班聯且增寵於外官當益勤於治狀可

昭宣使入內內侍副都知忠州刺史張若水可充
陵州團練使仍舊昭宣使入內內侍省內侍副
都知

勅朕纂承丕緒尊事兩宮按故事以薦崇名揆嘉辰而
考成室方慶晨昏之奉宜忘典領之勞寵以華資旌其

幹裕以爾具官某早推忠蓋久侍禁嚴出護塞垣之防
入聯內監之長夙宵匪懈績用兼優屬中寢之即安嘉
庀工之無曠俾因符守進領兵團外參握節之榮內重
珥璫之貴恩褒益茂報効宜堅可

皇兄茂州防禦使申國公世清可特降依前左武
衛大將軍郢州防禦使申國公

勅國家並建戚籙所以惇叙於九族優加命數所以表
異於諸王惟繼世之既殊固推恩而必異豈容僭冒以

躡罷榮以爾具官某胄出皇支系承公國間膺嗣爵之
貴靡念亢宗之艱而乃屢上奏章自言統嫡有司定議
當從別祖之封李春詔書已格泛遷之典弗思悛止重
有敷陳意在徼榮益章矯妄宜從貶秩之責仍罷奉朝
之趨尚追省於過尤勉欽承於曩訓可

大理寺丞李得臣可守太子中舍光祿寺丞吳立
禮可著作佐郎

勅具官某爾籍隸京司職更民政廉方之守既已效於

官成累久之勤茲亦應乎功令宜甄疇於善最俾敘進於榮資爾其欽承以永來譽可

前號州號畧縣令錢公鎮可大理寺丞前代州軍事判官張佑前權知果州團練判官鄭士衡可並著作佐郎

勅某官等今之仕於郡縣者既限以積累之資則其器能可見矣又難以保任之法則其操守可知矣會課來上閱實靡差寘之京司是謂慎選以爾等或起於門調

或進自儒科典邑佐州咸有善狀廷尉之屬蘭臺之聯
皆曰美官俾之並命偕此榮路並思後勤可

前岢嵐軍嵐谷縣令陳安靜前威勝軍武鄉縣令
張煇可並著作佐郎前永州零陵縣令梁宏可

大理寺丞

勅具官某國家掄才之路至廣而銓選之法惟艱既限
其累年之勞又責于上官之薦小不應格未嘗序遷以
爾勤於首公庶而寡悔知已言狀有司校功擢置王官

進階榮路其恩始卒之效以副獎拔之恩可

大理寺丞致仕趙賁可太子中舍致仕

勅某向者大賚天下增秩庶官退休之人所宜先及蓋
知止之可尚而高年之當禮也爾早由仕綴得謝盛辰
薦逢慶恩並應陟典擢列朝閨之籍足為暮齒之榮服
我殊私益嚮多祉可

太常寺太祝賈公述可舊官服闋

勅具官某服勤效智早列周行銜恤去官近終喪紀日

月云邁縞禪已除宜還簪紱之榮來就班聯之次勉思
移孝式竚揚名可

大理寺丞馬孝孫可太子中舍

勅具官某今之仕者去銓調而列京司由考課而陟朝
著雖序進之惟舊亦審覈之良艱爾向以幹廉從知已
之薦今用年次應有司之條遷秩儲坊通班閭籍惟爾
試吏之久宜稔修方之勤漸履榮階更圖來效可

衛尉寺丞劉士彥可大理寺丞大理評事田彥卿

可將作監丞太常寺太祝孫龜年可大理評事
勅具官某爾出于華胄能紹世風筮仕方初服勤可紀
既更筦庫之效且收歲月之勞稍進一官漸階榮路爾
其勉懋以副甄陞可

大理寺法直樊功立可光祿寺丞充大理檢法官
勅具官某祖宗以來慎用刑辟詳評審復以求厥中凡
在理官實重其選以爾拔從銓調職於平廷持法不苟
按年應格進擢膳丞之列仍司契令之煩並盡乃心往

贊而長可

守鄧州錄事參軍前監道州黃富場負素可大理
評事致仕

勅具官某久從銓調薦著吏勤既引年而自陳願還事
而休老嘉其退尚之佚特示寵遷之恩增秩京司榮歸
里社往欽厚渥足慰素懷可

虢州朱陽縣主簿李庚可國子監丞致仕

勅某爾仕於州縣而能持已以廉不蹈尤悔齒既耄矣

自言不能是亦知止可嘉者也秩以成均之僚俾為晚節之寵服我恩渥歸安里閭可

太皇太后遇同天節親堂姪內殿崇班曹誨男易可太常寺奉禮郎

勅某近者朕以載誕之辰承顏之禮乃眷近屬例均慶恩以爾長信之諸侯舊勲之昆裔嘉其幼立延以京司當念起家之榮無忘學古之訓可

京朝官知縣磨勘詞

勅具官某庶能之選早列於仕階撫字之求方紆於邑
綬屬攸司之比課謂滿歲以應條進以一官甄其累效
勉思勤儆往服恩榮可

承制以上磨勘詞

勅具官某夫仕者久而不遷則才愚同滯進而不以其
效則流品弗甄今有司所以限年而校功循階而進秩
者由此道也爾以材武擢於治朝內外煩使之勞訖無
曠事歲月薦更之比已應陟書稍陞等於官聯且疇庸

於閱閱往承新渥無怠後勤可

莊宅副使兼閤門通事舍人周永清文思副使賈
秀可並右騏驎副使

勅具官某夫守邊乘障之臣或失於悍勇而輕進或失
於畏憚而不為向非練習之有方何以綏懷而得所既
彰陳力何吝賞勞以爾擢自周行列於遠塞深知兵要
復察邊情嘉其任事之能宜有宿官之寵內司峻秩躡
等而遷益思忠蓋之誠式副褒優之命可

文思副使任有方西京左藏庫副使錢昌符可左
驍衛將軍致仕供備庫副使馬清可左武衛將
軍致仕

勅具官某夫陳力而仕不能則止是亦知夫進退之分
者也得不優以名秩徇其素心哉以爾武幹吏資仕於
班列勤勞之役更歷固多以疾告休所宜矜惜特遷環
尹之列俾為里閭之榮服我殊私保爾多祐可

供備庫副使侯元吉可西京左藏庫副使西京左

藏庫副使王思可文思副使東頭供奉官施惠
可內殿崇班

勅具官某國家官人之法靡有文武之異一用考格限
年叙遷所以嘉久職而勸吏勞也以爾早列周行繇更
吏幹庶能之守固有可嘉歲月之庸亦應茲令進秩一
等漸履榮階益思忠蓋之方以副甄陞之命可

內殿承制楊從先可西京左藏庫副使

勅具官某夫盜積山藪不時翦除則鄉閭之間人靡安

堵乃嚴賞格以勸事勞爾為廷臣出司巡警能用方畧
屏擒寇奸兇徒既除遠民無患校其勲等當有優遷躡
升內使之聯用獎武才之效欽承渥命益懋來勤可

內殿承制杜該許士臻可並供備庫副使

勅某等咸有武幹服在殿塗或案讞于邦刑副我欽恤
或訓齊于州旅不懈拊循質歲課以薦周嘉吏勞之可
紀宜推陟典擢貳使聯勉思宿業之勤以稱褒恩之渥
可

前內殿承制宋景先可舊官服闋

勅具官某爾為三班吏有年數矣曩逢慶渥當陟內朝
復用歲勞再遷殿著屬罹親恤遂去班聯日月其除祥
禪俄畢宜悉還於舊次俾入叙于周行祇服恩榮益虔
事守可

內殿崇班阮大有可內殿承制

勅具官某奉朝內著秩視閨籍之榮奏課中樞歲比吏
能之最允如令格何吝恩褒以爾久踐通班亦更煩使

勤庸可紀遷次有常進升等級之優用示才勞之勸勉
收成效無懈守官可

未復舊官人內殿崇班蘇濬可內殿承制

勅具官某郊祀之澤其施普矣在位者加以勲等左遷
者還其職秩所以示記功忘過之義也以爾早列周行
嘗紐吏議褫官斯久逢慶云初俾進復于舊聯宜益思
于後效可

東頭供奉官閣門祗候趙思齊可內殿崇班依舊

閣門祗候

勅具官某爾以禁廷之聯通上閣之直贊名典謁服職
有年校其事勞嘉有善狀考課之令遷秩有常擢列殿
塗之榮仍參門籍之貴惟爾舊族歷仕近班當懋舉于
官儀且無忘于世美可

東頭供奉官張宣禮朱興可內殿崇班

勅具官某爾補吏三班有年數矣而能勤于治職謹而
寡尤校其事勞甫應遷格宜陞華于殿著且通籍于朝

聯益恩遷次之艱更圖報稱之效可

天武右第三軍都指揮使昌州刺史胡元可武衛
將軍致仕

勅具官某夫壯而陳其力老而謝其事固當優異使之
便安以爾歷職和門兼榮州縣迫于衰老願遂歸休擢
居環衛之聯俾遂養頤之適欽承寵命足慰暮年可

翰林醫官守少府監主簿陳易簡翰林醫官守勤
州富林縣主簿秦宗古可並守殿中省尚藥奉

御依前充翰林醫官

勅具官某周官醫師有上士中士之秩每歲稽其醫事而制其祿食所以校能否而疇勤勞也以爾學農黃之書通扁和之技隸名中禁恪職有年特陞六尚之聯益懋十全之效服茲優典無懈厥官可

皇太后殿樊氏可典賓馮氏可典贊吳氏可掌籍
楊氏可掌記

勅周官女史掌內宮內令之法則今兩宮給事之職是

矣閱歲既久增秩其宜皇太后殿具官某氏言德有聞
閑和自飭早陞宮掖祇奉母儀嘉其積勤推以優渥俾
進司於典掌宜並務于欽承可

太皇太后殿典言吳氏可司設典言杜氏可司正
吳氏可典贊李氏可典記花氏可典珍張氏可
典綵劉氏可典正王氏可典計董氏可典設

勅宮省有秩典司各殊矧長信之置官事掖庭而寢久
宜頒渥命用獎能勤太皇太后殿具官某氏性稟閑和

體姿柔婉自入承于嬪御嘉薦歷于歲華遞陞婦式之班俾重慈闈之侍往膺恩渙無怠祇欽可

檢校尚書水部員外郎充成州團練副使吳靚可
依前檢校尚書水部員外郎充定國軍節度行
軍司馬不得簽書本州公事

勅具官某敬者所以推大德于天下靡有遠邇咸與維新矧曰士人可無銓敘以爾早通閨籍自致敗官黜佐方州再逢恩霈宜稍遷于大府尚無訕于散僚益思省

循佇期甄錄可

檢校水部員外郎充秀州團練副使鄭民先可依
前檢校官充昭慶軍節度行軍司馬不得簽書
公事

勅某近歲之法以賄敗官者雖坐輕典亦置之散秩所
以責廉隅于士大夫也爾一絰吏議于茲有年慶恩滌
瑕府佐移秩其益思於修省毋自怵於廢淹收之晚年
豈終汝棄可

萬載縣尉劉永清可蔡州真陽縣令

勅夫民愚無知至為剽盜賊殺不辜其惡甚矣爾作尉遠邑能勤厥官奸宄就擒即寘于法捕賞之格表勸在焉命爾長民酬茲成效尚圖來譽以副寵遷可

相州安陽縣尉劉子駿可知蘇州錄事參軍

勅具官某爾為邑尉而能擒捕寇攘肅清里閭斯謂善於其職得不酬之以恩擢紉郡綱用勸能者並勤後効式佇甄陞可

祕書監致仕祝正辭男延賞可守將作監主簿

勅某士大夫以老致為臣而歸斯亦始終之節可尚者
得不延以世祿而慰其素懷乎矧爾父歷仕三品年至
告歸秩爾京司是謂優典爾其勉懋以亢厥宗可

光祿卿陳鑄遺表第四男公彥可試祕書省校書

郎

勅某生而任其力歿而恤其家此朝廷所以篤羣臣始
卒之義也爾父致位諸卿考終明代祈爾一命以承厥

家俾試秩于蓬丘且聯華于郡幕服茲厚寵勿怠清修可

光祿卿知楚州竇彰男太廟齋郎汝礪可試秘書

省校書郎

勅某任子之令尚矣雖班等有異而世仕為優乃父方居於列卿嚴裡屬逢於大需蘄爾試秩使之起家茲為階漸之榮宜務清修之誨可

太常少卿直龍圖閣知廣州張田遺表男輔之可

試將作監主簿

勅某爾父才質器幹時推能臣宣力四方著稱五嶺不
幸淪棄用茲憫傷俾爾一官以續其世爾其深自勉懋
期於有成且無忘厥考之勤事也可

禮部侍郎致仕盧士宗孫盧君佐君傑可並將仕
郎試祕書省校書郎

勅某時乃大父朝之舊臣方告老以言歸宜推恩而及
後嘉爾幼立能紹素風特優試秩之榮俾遂承家之美

無忘善訓往服殊私可

守許州長史李評可守鄭州長史

勅某向虧廉守遂絰刑章寘于散曹示不終廢再逢寬宥從涖便州尚恩省循毋謂沈卹可

尚書屯田郎中致仕姜鎬男子厚可試秘書省校

書郎

勅某爾父仕歷閭臺位正郎列不待年至謝事而歸惟退尚之可嘉宜賞延之及嗣命爾試秩俾承厥家勉慕

前修無墜門構可

追官人前儒林郎守司戶參軍尹良佐可鄭州別

駕

勅具官某爾作掾列曹在法除籍適均霈典稍濯前愆
收于州佐之聯無謂恩章之薄可

光州團練使同提舉集禧觀公事向經奏百姓醫
人華詢可試國子四門助教

勅某方技自名診治盡善屬攬通侯之奏且援試秩之

科操術既明推恩何吝祇膺一命之渥並務十全之能
可

西京留司御史臺正名知班驅使官王德明可將
仕郎守蓬州蓬山縣主簿勒留

勅某隸名憲府給事西臺閱歲再周勤公寡過命勾書
于遠邑尚留職于故曹彌思恪恭無怠朝夕可

河東進納空名助教三十道

勅某昔卜式請輸其家半財以助邊費漢世善之爾能

發貨貲應募郡國嘉其誠意宜有甄表假以州秩俾榮鄉閭承茲渥恩用勸厥衆可

蕃官右武衛將軍兼監察御史柱國香布咩布噉
移可並加上柱國右監門衛將軍兼侍御史驍
騎衛儂宗旦右監門衛將軍兼監察御史武驍
尉寇名山可並加騎都尉

勅具官某向者禮行泰時恩浹羣方眷言忠順之臣宜
厚旰鴻之澤以爾才雄邊鄙心邇本朝環衛榮階早膺

于嘉命裡燔慶渥特霈于殊私進加勲級之華益壯裔
藩之觀爰茲受寵無怠勤王可

府州靖化保屯毛州族子弟屈移可銀酒監武充

本族副都軍主

勅某爾父世居邊土籍隸轄門俄遘疾以淪亡覽守臣
之保任言爾勤事宜承舊名往膺甄擢之恩益務撫寧
之效可

南郊百官封贈父母妻共五道

勅某夫為人子者以揚名顯親為孝非夫委質昭代陳力周行則安能推榮以逮先世曩朕郊丘已事之日肆慶天下乃俾士大夫得以陳追述之請所以隆舊章而廣孝治也以爾生而慶善之積志不得充歿而緒餘之傳報乃在後嘉爾有子仕吾通閭屬霈恩之普加推卹典以示厚營魂未泯滲澤斯承可

亡母

勅某郊為大祭既格于上下神祇惠浹庶邦靡間于幽

明隱顯矧乃閨朝之士有懷鞠育之慈爰舉舊章優加
寵命以爾婦德之順既宜其家母道之脩遂貽厥子屬
精裡之霈澤昨封邑以開榮用增飾壤之恩茲慰寒泉
之感可

父在

勅某朕初卜郊大賚天下無有遠邇均蒙福釐乃眷在
廷之臣咸切逮親之寵因推朝渥庸達孝心以爾某善
積于躬慶延厥後有子而仕通籍于朝宜承霈澤之榮

茲顯教忠之美永錫爾祚對時之休可

母在

勅具官某母某氏廼者朕郊見天地裸獻祖宗承神之
休均澤于下嘉我庶士方逮承顏之榮宜推渙恩用彰
錫類之美以爾慈嚴之範見推內嫺鞠育之仁成乃子
志舉茲慶典進以邑封欽膺褒寵之光益享壽康之報
可

妻

勅具官某妻某氏古者上有大澤則惠必及下祭其是
歟日朕初見郊廟承神之休推福于天下士之立朝者
既已加乎恩級而又推榮及乎私室其惠澤可謂大矣
以爾能執婦道歸嬪士家時惟爾儀服我朝竊舉茲慶
賜之典寵以號封之榮茂對殊私益勤內助可

兩制母在改封

勅郊祭之推恩也上以均天地之貺下以揚祖宗之休
福隆紛然中外時若嘉我髦士方逮承顏之榮厚其寵

童用光錫類之祉具官某母某氏慈嚴有度明智兩通
從夫之賢固多內助之美有子而貴尚深側眄之規克
成令名服在清禁宜躡封於大郡且旌善於北堂欽承
優渥之恩益享壽康之福可

兩制妻改封

勅祭有惠下之文所以明神貺婦有從夫之貴所以厚
人倫裡燭方畢於陽郊慶澤用霑於家壺具官某妻某
氏德通四教行表六嫔詠君子之好逑嬪風素懋循大

夫之法度內治尤彰列予近班實惟爾特屬邁邦熙之慶宜旌主饋之賢寵以封君進乎善郡祇服褒華之渥益宣輔佐之勤可

太常少卿田照鄰母彭城縣太君劉氏封仁壽郡太君

勅朕向以初郊大賚加禮高年有疏封錫命之榮緣貴老近親之義某早鍾善慶克享期頤從子方仕於亞卿承顏既嘉其逮養攬州僚之列奏寵壽母以宜優特出

殊私進加善郡為爾慈堂之美彰我孝治之風可

故內殿崇班范愿妻錢氏可封永寧縣君

勅夫封疆之臣既以死而勤事朝廷之法當加等以推
恩念往矜存用旌壯節以爾具官某妻某氏良家之子
能臣之妻屬乃夫之戍邊由捍寇而畢命爰推殊渥俾
逮厥家特疏湯沐之封用表閨門之美欽承恩獎善撫
惇孤可

遼山縣令賈祥母著作佐郎周綸母並年九十一

歲封縣君南宮縣令董京父年九十一歲可守
秘書省校書郎

勅某向者已事泰壇均釐列位厥有親年之耄未登封
賞之科特霈殊私式彰孝治以爾壽康之福實應詔求
慶善所終誠宜表顯寵以蓬丘之列用為子舍之榮並
湯邑之號保餘齡無忘休渥可

歸州巴東縣令元大章母年九十一歲封長壽縣
君

勅某夫耄期之年前世之所加禮者曩緣郊慶特俾推
恩以爾既壽且康從子而仕茲誠五福之所嚮是亦積
善之有憑寵以邑封旌其孝養往承茂渥益享遐齡可
台州百姓王延贊年一百一歲求歸年一百二歲
可並守本州助教

勅某夫貴老尚齒王政之所先矧夫百年之人五福之
貴者得不加禮而優寵之乎以爾居鄉有聞介壽克永
宜因郊慶之澤假以州秩之榮且俾里閭知所推尚斯

亦有助於風教也可

南郊致仕率府副率加恩

勅某祭有大澤惠均庶工屬郊時之禮成眷丘園之佚
老例推優渥叙進榮階祇服恩華足慰恬尚可

南郊諸州軍衙前加恩

勅某服勞吏役歷稔公庭屬逢郊需之恩宜被言綸之
命例加試秩用獎久勤可

蘇魏公文集卷三十四

欽定四庫全書

蘇魏公文集卷三十五

宋 蘇頌 撰

外制

皇叔彰德軍節度使左僕射同中書門下平章事
宗樸故育母樂安郡太君吳氏追封永嘉郡太
夫人

勅朕惟祖宗敦睦之義定爵祿名數之差雖位為公侯

猶不以親私而干寵恩有顧復乃當用子貴而議封禮
亦為宜朕安敢恡具官某故育母某氏謹幽閒之治有
柔潔之風奉事王宮夙彰於賢範挺生懿戚方嗣於慶
宗向緣裡類之恩載形追命之請稽諸甲令抑有舊章
以副笄象服之儀為厚窆華阡之責尚茲冥漠歆是寵
榮可

皇兄故金紫光祿大夫右武衛大將軍世符可贈
鎮海軍節度觀察留後北海郡公

勅夫睦親之恩生則有班爵之等恤後之義歿則有賙
祔之榮特舉彛章用寄哀戚具官某天枝擢秀宗邸稱
賢寢陶信厚之風克謹驕盈之戒早膺時寵荐服衛環
假節兵防秩視通侯之貴奉朝禁籍日勤拱著之趨詎
謂盛年奄茲徂謝九州近鎮兩使隆階用加飾壤之儀
仍昨封公之爵營魂未泯漏澤是歆可

皇伯故右龍武大將軍克友可贈華州觀察使華

陰侯

勅班爵之榮所以表敦睦之義贈卹之典所以厚始終
之誠眷言宗邸之賢久預朝闈之列奄茲淪逝宜有追
褒以爾具官某挺生王家早聞邦教不以貴寵而易其
守故能謙慎而保厥家籍在衛環峻官儀而益重任兼
團結持使節以參華何圖盛年遽邁凶閼遽以庶車之
秩胙之侯社之田寄我悲懷慰爾冥路哀榮之禮茲莫
重焉魂而有知歆此殊渥可

皇弟右千牛衛將軍仲涂可贈右屯衛大將軍

勅國家之於宗族惇睦之恩至矣生則有寵貴之榮歿則加追賁之典惟其禮秩皆不與外庭比所以厚親戚而厲人倫也以爾具官某溫良之性得於天資謙慎之儀成於邦教處貴而能循禮法奉朝而匪懈夙宵假寵衛環方參聯於表著棄捐館舍遽淹質於泉塗宜推褒恤之文且示哀榮之渥八屯峻列大將通班刻以蜜章告於循路顧明靈之未泯諒滲澤之可承可

故楚國大長公主可追封秦國大長公主謚莊孝

勅外館懿親生而視王侯之貴曲臺故事歿則推贈賻之恩言念平陽之嫻素鍾長信之愛方見尊寵遽茲淪亡宜加卹典之優用寄悲懷之切以爾某氏麗穠華之質分星婺之輝生於宸闈蔚有賢範降嬪戚里蚤開府屬之榮胙土名區載徹粉田之賜朕以仁祖之息諸姑之倫荐崇秩儀固越彛等不幸罹於美疢奄然奪於盛年追惟淑靈當有褒表夫節惠之義實重於二名進封之科莫先於成國以顯服而旌遺德以刻章而告幽途

情禮並隆明誠斯饗可

故永嘉郡夫人趙氏可追封蕭國夫人

勅貽彤懿範生則有脂田之封漏澤深仁歿則有綬章之飾追懷遺美特示榮褒以爾故某氏體質柔閒性資循裕夙謹女圖之鑒內參宮尚之聯而淑質靡留徂年早謝嘉乃柔風之茂宜推象服之華國壤疏恩壙宵增賁想芳靈之未泯宜寵典之斯承可

皇太后姑故右侍禁李守慶妻高氏可特封延安

郡夫人

勅朕丕承先烈欽奉母儀矧彼諸姑實冠親姻之黨特加異數式隆懋愛之風皇太后姑故具官某妻某氏備有德言能循法度早歸嬪於華族方尊寵於外家以推恩章抑惟舊典爰進封於善郡且加號於小君所以上慰慈顏兼褒懿範膺茲嘉命克保殊榮可

皇太后妹右班殿直聶宣仲妻高氏封平恩郡君勅外家之愛禮有懋隆從母之倫恩宜顯厚加崇命數

豈限等曩皇太后妹具官某妻某氏毓質粹和秉心柔
令結衿褵於夫室夙擅華腴侈車服於親姻尚稽表異
躋進號封之美仍開郡壤之榮祇服褒章永綏福祚可

皇太后妹皇姪故鄆州觀察使令典妻高氏封長

樂郡君

勅朕惟長樂之姊弟相在藩侯之室家戚屬並優禮意
宜厚稽諸令甲當有寵褒皇太后妹具官某妻某氏系
出舊勲望高外族有閒和之範來嬪宗嫔有介靜之誠

能保婦操爰推惇叙之澤超進號封之榮善郡美名用旌賢懿隆恩異數當克欽承可

皇太后姊皇伯文州防禦使宗遠妻封咸寧郡夫人

勅朕惇睦九族尊事兩宮惟國藩世母之賢本長樂天倫之愛宜加顯命庸慰深慈皇太后姊具官某妻故某氏蘊柔德之和襲舊勲之慶夙推婦順歸我宗英雖懿質之早零想芳猷而未泯載稽典式寵進號封追榮象

服之崇用賁壙宵之貴淑靈不昧厚渥斯承可

太皇太后姪孫曹詮女皇叔克頤妻曹氏封同安

郡君

勅長信族屬宗室世嫔案諸典章所宜寵異矧夙承於
愛育宜特茂於恩徽以爾具官某妻某氏資稟靜專幼
聞禮教出於椒禁歸我藩侯亦既宜其室家能不失於
婦道因疏郡壤命徹號封祇欽獎綍之榮益念荐繁之
助可

皇兄右千牛衛將軍叔皮妻曹氏可封永嘉郡君
勅具官某妻某氏宗室諸婦禮有賜封長信外門恩先
近屬厚親廣愛在義則然以爾承地胄之華富柔明之
美早被慈闈之訓育能勤女史之箴規輦佩有行既歸
於邦族粉田均澤宜茂於寵章進開郡壤之榮用顯戚
藩之盛膺茲麗渥保爾令名可

祁國長公主乳母侯氏可封壽光縣君

勅某氏朕以長公主先帝之息我之同氣築館於外筮

日有行恩禮所加固宜優異惟其阿保之列夙勤燥濕之安寵以邑封蓋循邦制往承渥渙母替謹柔可

左羽林大將軍令圖故母同安郡君王氏可追封

南康郡夫人

勅向者禮成郊報恩浹幽明惟班著之聯咸被顯親之澤矧宗藩之秀方深念母之懷加厚卹章抑惟舊典具官某妻某氏柔儀有度順德不愆嬪我懿親夙彰賢範雖歎徂年之謝尚嘉有子之良緣茲慶條進以封號俾

追榮於象服姑用慰於寒泉冥漠有知寵靈是享可

尚書吏部侍郎叅知政事韓絳封贈三代

曾祖處均贈金紫光祿大夫太師中書令可特
贈兼尚書令餘如故

勅任人共政國體之所先揚名顯親人臣之尤貴屬我
登賢之始爰推率祖之恩峻以職儀慰彼誠孝以爾某
生稟純德世服文儒居則仁義充其中不以紛華悅於
外養浩然之氣自樂於鄉閭遜貽厥之謀遂開於似續

作我良輔時其裔孫因進擢於台司俾再加於冊命以
中臺總領之秩告三世享嘗之庭臣子之榮可謂至矣
所宜歆識益祚爾家可

曾祖母追封秦國夫人李氏可追封秦國太夫人

勅貳公演化方登用於柄臣追孝奉先宜褒榮於世配
荐推恩數用賁家庭以爾具官某曾祖母某氏挺柔順
之姿躬德言之範夙成壺則茂振嬪風雖久閱於音容

尚克流於惠聞曾孫之慶大政是毗副筭六珈已屢頒
於象服沃野千里宜載徹於粉田併爾寵章式旌遺懿
可

祖保樞贈太師中書令尚書令可追封燕國公
餘如故

勅今夫與我共守祖宗之業而裁成天下之化者非二
三輔弼之臣歟故於進拜之初優其禮命而追榮及於
祖考所以欲其移孝而為忠也以爾具官某祖某天質

渾厚器識閎通有長者之風而自晦其德有君子之澤而垂裕於後克生賢嗣為時大臣今而令孫復嗣厥位薦歷機庭之貴進毗台宰之司奕世三公宗祏已崇於典冊封爵五等燕邦載徹於土田告諸幽局識茲茂渥可

祖母追封魯國夫人周氏可追封魯國太夫人勅登四近之臣贊萬幾之務恩隆體貌義切股肱諒非積慶之有源曷副疇咨而入用爰推異數用表先芬以

爾具官某祖母某氏稟訓姆師能勤婦道約珩璜而制禮動中音儀潔蘋藻以承家克修宗事蘊是懿德鍾於後昆翟茀之儀已加於象服脂澤之邑載錫於名區不易故封式昭遺美淑靈未泯厚渥斯承可

祖母追封魯國夫人郭氏可追封魯國太夫人勅登用二府所以圖國家之治追寵三世所以教臣子之忠我有碩臣方毗大政封崇先代抑有彝章以爾具官某祖母某氏性蘊淑和道遵慈儉出於華胄歸彼令

人曾微出梱之言居有擇鄰之訓積是餘慶克昌後昆
維子洎孫繼顯庸於台路徹田胙國屢加寵於國封曲
阜舊邦小君美號再加錫命庸慰孝思維精魄之未亡
尚寵靈之是識可

父億贈開府儀同三司太師中書令尚書令上
柱國可追封周國公餘如故

勅流之長者由夫源深枝之茂者自乎本固眷我碩輔
出於名門若時奮庸克大前烈將慰述先之念載疏錫

壤之恩以爾具官某父某在仁祖世以嘉謨碩畫進貳
機衡忠規具載於廟彞義訓乃貽於子舍朕以絳體質
方重論議純深願為良臣善守先代擢於世職可謂象
賢當其拜衮之初必動履霜之感相爾舊國時維成周
再加九命之崇用顯三公之世告於宗祏尚或歆承可
母追封普安郡太夫人蒲氏可追封崇國太夫
人

勅陟台衡而預政方擢幹臣飾泉壤以疏封盍旌懿範

屬此疇庸之始爰推錫類之恩以爾具官某母某氏挺
生慶門作配君子有四德之美成二族之和室家之宜
既克成於婦道日月其逝愴弗逮於朝榮宜因嗣子之
登台載徹脂田而錫命小君之號啓國於崇并示寵靈
賁於廟室可

母追封平陽郡太夫人王氏可追封榮國太夫
人

勅禮傳所稱女子有三從之義冊命之錫封爵有四等

之殊緬維芳風實蕪具美以爾具官某母某氏丞相太尉之子中令周公之妻出自慶門歸彼時傑生見榮盛歿餘慶靈有子而賢載世預政屬咨俞之拜後念顧復之有懷俾擇名區用胙乃國二族顯赫無若爾家前史所謂婦人之貴其謂是乎魂而有知當歆茂渥可

新除右諫議大夫叅知政事王安石封贈三代

曾祖

勅禮稱天子之大夫祭及三世又曰父為士子為大夫

亦祭以大夫蓋從生者之祿由古然也今夫執政之臣
同體元首顧其名數豈特大夫之比則追賁祖禰禮宜
有加具官某曾祖某江左之秀德器素高義訓之傳世
風自遠榮名不顯於當世慶善乃流於後昆惟其令孫
作我良輔方屬登台之始用推本祖之恩以儲宮保輔
之崇為宗祏追崇之美精爽不昧寵靈是歆可

曾祖母

勅國家登用輔臣躋加命數參六卿於朝路預我政幾

享三室於家庭逮其世配均推滲澤庸達孝思具官某
曾祖母某氏明智自將慈嚴合度宜其家室蹈嬪則而
不踰貽厥孫謀贊台司而伊始命追榮於大郡且加號
於副并既啓有家之榮采光積善之報淑靈如在厚渥
其承可

祖

勅夫積之厚者其流光位之崇者其禮異我得棟幹擢
在柄司立於朝廷則有協心同體之義念其祖考豈無

進封飾壤之榮稽若故常具存彝典具官某祖某服道
秉誼含章葆和寘彼周行未登貴仕之列施於孫子蓋
有陰德之憑用裕厥宗再世而大王室其人祖構是
承惟東儲二品之班視前世三孤之秩錫此明命責於
私庭魂其鑒茲罔祚爾後可

祖母

勅國家待執政之臣禮亦重矣既尊寵其人又追責其
祖妣所以嘉似續之慶因以勸夫在位重其本而厚其

報也具官某祖母某氏挺賢明之識兼婉淑之儀善行積於厥家慶靈久而後大參予近弼之貴時乃令孫之賢諗是忠規本乎門法彤管有煒既彰家道之成象服是宜乃正封君之號冀爾冥漠嘉茲寵靈可

父

勅前史稱臧孫達之有後又美鄭公業為不亡蓋繼之者賢則美濟厥世未若父為儒者名稱於一時子為輔臣寵延於三世非其善訓夫豈享茲具官某父某素履

清修周才敏邁策名從政進乃望郎之華佐郡典州藹
然良吏之稱位弗充量福固有基若時嗣子之賢登我
台司之貳逮親之感方對於鼎茵追往之恩用加於冕
紱以儲師之峻秩為襁室之褒榮魂而有知饗此殊私
可

母

勅朝廷莫如爵故二府有異數之加寢廟莫如親故三
室有同牢之享矧惟妣德之懿豈吝卹章之褒具官某

母某氏言憲典常德馴慈順歸儷良士寔生令人諷召
南之詩則蘋蘩之薦不失服季姜之戒則經幅之喻以
明時其邦傑之奮庸抑自家庭之垂裕參聞國論既聯
三事之崇追述母儀用錫六珈之副茲所以彰我閨澤
之漏慰彼寒泉之思緬茲淑靈享是嘉命可

母

勅仕之貴者莫貴於作弼孝之大者莫大於顯親登賢
既預於政司報德宜先於禰室推存念往我何吝焉具

官某母某氏備有言容能循法度從夫而仕則內助之德修有子而賢則陰德之施顯屬茲圖任之始固切慈顏之懷用加號於小君且進封於大郡侑爾宗祏既開家采之榮利於嗣人無忝公台之寄可

觀文殿學士兵部尚書知青州歐陽修

父

勅郊之祭也上以恭天地之報下以揚祖宗之休屬告成於盛儀遂推行於惠澤眷吾台衡之舊適宣方面之

勞懷其先芬既極顯揚之美昨以成國式章尊寵之名
具官某父某毓德士鄉策名聖世蘊濟時之用位下而
不得施憑積善之祥澤流而逮乎遠果有賢嗣大其門
閭袞衣蜜章已峻九儀之貴國封公爵俾增千乘之榮
非徒嘉爾教忠之能抑亦成吾廣孝之義精爽不昧優
渥是承可

母鄭氏

勅精禋類帝所以訓天下之恭揚名顯親所以教人臣

之孝曰予邦彥有懷母慈宜推慶恩用光賢範具官某
母某氏生有淑質歸於德門詠蘋蘩之詩則婦道克順
明經幅之喻則母儀備存貽此哲人作我良輔生雖不
及鼎茵之享歿而屢有湯沐之加承此神釐進以大國
夫封爵錫命誠未足慰孝子永慕之情而旌善表賢抑
可以成公朝獎勸之義惟爾冥漠歆茲寵靈可

妻薛氏

勅夫祭祀之澤廣矣既已推於群臣而又逮其家室所

以明神惠而厚人倫也矧吾舊德之配夙聞主饋之賢
慶典所覃寵章宜厚具官某妻某氏出高明之胄有柔
婉之風作嬪良人克相宗事潔蘋蘩以承祭匪懈溫恭
服副笄而預朝薦膺榮渥屬邁邦釐之洽載陪郡壤之
封且擇美稱益光內治往對褒華之命勤宣輔佐之功
可

翰林學士右諫議大夫司馬光父贈司空

勅朕宅位之再歲考卜郊之三年天其相予既克成於

熙事福不專享是用惠於庶工且追賁於先芬俾顯揚
於世美具官某父某德器閎茂風規峻凝徊翔臺閣之
華宣布藩朝之政經綸之業猶未究其施為燕翼之謀
蓋有貽於似續時其子舍服在禁林方見尊寵於朝廷
固已崇大其門構姑緣裡燎之慶載加襚服之榮秩
以上公位乎空土豈特章名臣之餘烈抑以慰嗣子之
孝思冥漠有知寵章其享可

龍圖閣直學士工部侍郎張揆父贈司徒

勅朕因郊以承天之序念親以及人之先爰推慶恩式
叙在位矧予名德之舊夙紹素風之傳卹典所加褒章
宜厚具官某父某躬服道誼內懷器能策名清時仕不
充於雅望垂裕後嗣職久列於近班蓋源之深者流自
長而位之隆者禮亦異姑緣肇祀之渥用顯教忠之能
秩以上公總乎五教尚歆告第之寵益旡有家之蕃可

侍衛親軍馬軍都虞侯楊遂

父

勅郊丘之祀所以訓天下之恭贈祿之恩所以達諸臣之孝甫成熙事爰覃慶章且先追往之恩用慰因心之感具官某父某吉履有素鄉評所推善行在躬而未彰慶靈至子而乃復勤宣職業良嘉父教之忠欲報劬勞俾進尹環之列尚歆殊渥永裕後昆可

母

勅郊祭之推恩也上以均天地之況下以揚祖宗之休福釐紛然中外時若眷言拱著之列方逮承顏之榮宜

厚寵章用昭報德具官某母某氏以柔賢之美既宜夫家以慶善之憑獲從子貴俾躡封於大郡且均寵於北堂欽承優渥之恩益嚮壽康之福可

妻


勅朕初郊泰元大賚天下思與士類均承福釐眷言拱衛之聯並開爵邑惟其家室之慶宜懋寵章具官某妻某氏備有言容能循法度從夫而顯主饋是承屬大祀之休成均湛恩而下達進榮大郡增美華宗益宣內助

之勤用稱重封之渥可

樞密使劍南西川節度使守司空兼侍中文彥博
奏汾州介休縣草澤史釗妻文氏追封永嘉縣

太君

勅某氏鍾慶德門歸嬪吉士屬徂年之早謝閔昆裔之
靡承眷我台宰之賢方有諸姑之愴願移恩施正以號
封俾開爵邑之榮慰彼幽泉之路顧惟精魄尚識寵光
可



蘇魏公文集卷三十五